




JOXE LACALLE

Atzo aurkeztu zuten Iruñean, UEUko ikastaroetan, *Bat* aldizkariaren zenbaki berria.

Finlandiako hizkuntz egoera aztertu du 'Bat' aldizkariak

Ale berriak agerkariaren beste aro bat zabalduko duela diote

Miren Iriarte / Iruñea

Bat soziolinguistika aldizkariaren 30. zenbakia aurkeztu zuten atzo Iruñean, UEUko ikastaroetan, Iturruma ikastetxean. Aldizkaria EKBk argitaratu du orain arte, eta, erakundea desagertu denean, erredakzio batzordeak ziurtatu dio etorkizuna. Zenbaki berriaren gai nagusia Finlandiako suomiera da.

UEU-KO Iruñeko ikastaroak egiten ari direla, *Bat* soziolinguistika aldizkariaren 30. zenbakia aurkeztu zuten atzo Iruñeko Iturruma ikastetxean. Arduradunek esan zuten, ale berriak agerkariaren aro bat itxi eta hurrengo zabaldu egiten du.

Bat aldizkaria EKBk kudeatu izan du orain arte, baina orain, batzarrearen helburuak erdiesten ari direla-eta, desagertu egin da, eta agerkariaren erredakzio batzordeko kideek hartu dute bera-rekin jarraitzeko ardura. Atzoko agerraldian aldizkari-ko zuzendari Jose Luis Alvarez Enparantza *Txillardegi*, aldizkari-ko koordinatzaile Imanol Esnaola eta batzordeko kide Xabier Isasi izan

ziren, eta *Bat*-en etorkizuna «ziurtaturik» dagoela esan zuten.

Finlandiako suomiera

Aldizkariaren 30. zenbakiak Finlandiako suomieraren kasuaren azterketa du gai nagusitzat; dossier batean, munduko bizitza maila altuenetako duen lurraldean gutxitua zen hizkuntza nagusi izatera nola eramán duten aztertu dute, hiru artikulutan. Agerkariaren arduradunek, gai hau lantzea erabaki zutenean, bi helburu izan zuten gogoan. Batetik, nazioartean gertatzen zenaren inguruko dossier sail bat egitea. Bestetik, irakurleei orain arte arrotz izan zaien proze-

sua hurbildu nahi izan dieten, «gure herrian suomiera normaltzeko prozesuak guretzat ikasgai ugari zituelako».

Dosierra hiru ataletan banatu dute. Lehenengoa, normalkuntzaren ingurukoa, Txillardegi idatzi du, eta normalkuntzaren alderdi juridiko, politiko, kultural eta demografikoa landu du. Bigarrena Andoni Sagarnak idatzi du, eta hizkuntzaren historia, ibilbidea eta corpusa eratzeko izan dituen eragin eta oinarriak lantzen ditu. Hirugarren artikuluan hizkuntza marko konstituzional eta juridikotik landu du Kenneth McRaek.

Soziolinguistikaren inguruko gai gehiago ere landu dituzte *Bat*-en zenbaki berrian. Paula Kasaresek Baztanen euskararen egoeraren inguruan idatzi du. Artikuluak, antropologiaren ikuspegitik, datu esanguratsuak ematen ditu Baztan, erabat euskalduna izan arren, urte gutxitan zergatik erdaldundu den ulertzeko.

laburrean

■ Osasun publikoaren aldeko apustua berretsi du Gabriel Inclan Jaurlaritzako sailburuak

GABRIEL INCLAN Eusko Jaurlaritzako Osasun sailburuak atzo azaldu zuenez, ona da konpetentzia izatea osasun publikoaren eta pribatuaren artean. Alabaina, osasun publikoaren aldeko apustua berretsi zuen, haren alde egiten baitute Gipuzkoa, Bizkaia eta Arabako herri-tarren %93k, berak eman zituen datuen arabera. Inclanek Quiron Klinika baten inaugurazio ekitaldian parte hartu zuen atzo Donostian. Sailburua osasun publikoa pribatizatzearen kontra agertu zen, eta osasun publikoa ahalik eta onena izatearen alde agertu zen.

■ Gaur ospatuko dute Gasteizen Jaurlaritzak antolatutako lehen 'Festa Dolly'-a

EUSKO JAURLARITZAKO Drogomenpekotasunaren Kon-trako Idazkaritzak antolatuta, gaur ospatuko dute Gasteizen lehenengo *Festa Dolly*-a. Ez izan *Dolly* lelopean ospatuko dute festa, eta han deia egingo diete gazteei «alkoholaren erabilera inteligentea» egiteko. Festa gaueko 11:00etatik aurrera izango da Aiotz plazan. Besteak beste, ilea apaintzeko tailer bat izango da, dantzaleku bat eta karaoke bat. Gasteizko festaz gain, datozen asteotan Bilbon, Laudion, Zarautz eta Gernikan ere egingo da.

■ Iparraldeko sei hondartza hetsi dituzte, egunotako ekaitzek begibistaratu duten kutsadurarengatik

AZKEN egun hauetako ekaitzek kutsadura begi bistara aterarazi dute Iparraldeko itsasoan. Miarrizteko Didier Borotra auzapezak bi hondartza hetsi ditu bere hirian, Marbella eta Milady. Era berean Angelun Alain Lamas-soure auzapezak lau debekatu ditu publikoari; VVF, Salbes d'Or, Marinela eta Barra. Itsas bazter horrendako hain garrantzitsua den turismoarentzat gaitz inportanteak dira heste horiek, kosta kanpotiarrez betea den mementoan. Halaber, ur kutsatuaren kezka berriz ere azkartu du.

■ Errepidean gurutzatuta geratu zen kamioi batek trafikoa eten zuen Berrizen

ATZO auto ilarak sortu ziren BI-633 errepidean, Gorliz parean, kamioi bat bidetik atera, eta errepide erdian gurutzatuta geratu zelako. Ertzaintzak jakinarazi zuenez, kamioiak bi norabideak moztuarazi zituen goizeko 06:30etatik aurrera.

■ 5.000 pezetako billete faltsuak agertu dira Gasteizen, Udaltzaingoak ohartarazi duenez

UDALTZAINGOAK Gasteizko herritarrek ohartarazi ditu hirian 5.000 pezetako billete faltsuak atzeman dituztela-ko. Poliziaren arabera, billeteak kalitate eskasekoak dira, eta atzemateko oso errazak dira. Udaltzaingoak jakinarazi duenez, azken bi asteotan zenbait billete faltsurekin ordaindu dute hiriko merkataritza gunen zenbaitetan. Haietako hiru Poliziaren eskura iritsi dira, merkatarien bitartez. Poliziak uste du billeteak kalitate eskaseko eskaner eta inpresorearekin egin dituztela, eta faltsutzea atzematea erraza dela, ikumenaren edo ikusmearen bitartez.

■ Bagera elkarteak positibotzat jo du Donostiako Jazzaldian euskarari eman zaion erabilera

AURTEN ERE, Jazzaldian euskarari eman zaion tratamendu eta erabilera neurtu du Bagera e Donostiako Euskaltzaleen Elkarteak. Bagerakdioenez, informazioan eta sarreretan zeuden pertsonak euskaraz mintzatzen ziren. Horrez gain, argitarapenean euskarak bere lekua izan du beste hizkuntzekin batera. Emanaldietan ere erabili da. Ildo horretatik jarraitzeko eskatu die Bagerak Jazzaldiko antolatzaileei, «hurrengo urteetan ere euskarari gunen propio eta nabarmena ematen».